

"Flash" Pantophlet a muri na St. Maarten

Den corto tempo ayera mainta principalmente na San Nicolas, noticia a core di fayecimento di **Rosendo Arsenio "Flash" Pantophlet**.

Na San Nicolas "Flash" tabata masha popular for di mey mey di decada 60 y comienzo di decada 70. Flash tabata alumno di Prinses Marijke School pabao di Lago Sport park e tempo ey y a sigui despues pa John F. Kennedy. E tabata un amante grandi di musica y tabata combina esaki cu su school.

El a lanta un banda musical **"Simple Souls"** y principalmente riba diadomingo tabata toca

hopi den Don Bosco club na San Nicolas y hasta tabata tin fan club di **"Simple Souls"** e tempo ey.

Despues di a termina su estudio tecnico el a bay Huianda pa studia pa Bouwkundig Architect y na mes momento di su estudio a sigui cu musica y a funda **"Flash Tropical Steel and brass"** y tabata masha popular cu e banda aki den **"De Hooiberg"** na Rotterdam.

El a biaha rond di Europa tocando cu su banda y a bira un artista renombrá na Hulanda. Despues el a bandona Hulanda y establece su mes na St. Maarten. El a

cuminza aki su tienda di bende instrumentonan musical y disco cu CD y combina esaki cu su oficina di arquitectura. Na St. Maarten el a bira e musico di **"One man band"** cu su equipo musical, su steelpan y piano. Algun aña pasa el a saca su CD **"Maria"** dedica na un novia. E tabata masha popular tambe den seno di miembronan di e club di **"arubiano"** **"Chuchubi"** y dos aña pasa a ricibi homenaje grandi di Chuchubi. Aña pasa artistanan arubano na Hulanda tambe a tene un homenaje grandi pa **"Flash"**.



Por corda ainda con el a yega Aruba dos aña pasa y na aeropuerto a kita su CDnan cu el a trece pa familia y cu e asunto aki a sali tambe publica di e disgusto cu el a haya.

Na Aruba e tabata tin lazo masha estrecho cu musiconan manera **Elgin Juddan d.f.m. cu Teddy Philips, Kaiso Teddy** rey actual di roadmarch y su ruman **Claudius, cu Lloyd Baptist** entre otro, mientras cu na Aruba y despues na Hulanda e tabata masha cera cu **Young Quicksilver**.

"Flash" a bira malo, sconde su malesa pa hopi tempo pa esnan mas cerca di dje, te cu a yega na e condicion cu e no por sconde esaki

mas ya cu e tabata terminal caba.

For di luna pasa mi a ser poni na altura cu e ta hopi malo y ayera mainta a drenta e informacion cerca mi cu Flash, e trovador musical, a fayece. Den corto tempo yamadanan a drenta di su fayecimento y tambe un tabata yama otro pa informa di esaki. A pesar cu e tabata residencia na St. Maarten, hopi na Aruba a perde un bon amigo, y su familia na Aruba sigur tambe ta sinti e perdida di Flash cu a fayece na edad di 56 aña diahuebs atardi na St. Maarten.

Na su sernan keri, hopi forza y cu Dios tuma **Rosendo Pantophlet** den su reino.

Junby Naar.